



12. november - 2024

UKA2024/125

**Pisortat namminersortullu suliffeqarfiini atorfinerlaat 30-it inorlugit ukiullit tamarmik kiisalu atorfinerlaat killilimmik pisinnaasallit tamarmik qaammatini arfinilinni siullerni atorfeqarnerminnut atatillugu siunnersorteqartinneqalissappata/ikorfartorteqartinneqalissappata tamatuma iluaqtissartai ajoqtissartaalu allaaseralugit Naalakkersuisut nassuiaasioqullugit peqquneqarnissaanik Inatsisartut aalajangiiffigisassaattut siunnersuut. Taamatut aqqissuussisoqarpat tamatuma pisortanut namminersorlutillu inuussutissarsiuqartunut qanoq akeqarsinnaanerani naatsorsuinerneq nassuiaat imaqassaaq.**

(Inatsisartunut ilaasortaq Anna Wangenheim, Demokraatit)

Inatsisartuni ilaasortap Anna Wangenheim-ip siunnersuutaanut Siumumiik qujavugut.

Aallarniutigalugu oqaatigissavarput, inunnut innarluutilinnut inuiaqatigiinni akuutitsinerput annertuumik kommunini nukittorsagassaamat soorlu suliffisaqartitsinikkut inuiaqatigiillu akornanni pisunut.

Ilumoorpoq avataaniik soorlu kangiamiunik tikerartitsineq taakkuninngalu suliffinni assigiinngitsuni atuineq annertusiartuinnarmat. Taakkua suliffiisa ilarpasui nunatsinneersunik inuttaqarsinnaagaluarput ass. inuusuttunik aammalu inunnik innarluutilinnik. Tassami ajoraluartumik inatsisitigut immitsinnut killilersorsimavugut inuusuttuaqqanik aasakkulluunniit sulisoqarsinnaajunnaarluta.

Siunnersuuteqartup tikkuarpaa siunnersuisartunik peqartariartugut naalakkersuisullu akissuteqarput, pikkorissaasernerit ingerlaavartut, aamma atuarfeqarfiit ilinniarsiillu siunnersuisarneq ingerlakkaat taamatutaaq soorlu pisortat suliffeqarfiini siunnersuisarneq allaffiit aqutsisoqarfiinit ingerlanneqartartoq. Naalakkersuisup aamma nassuiarpaa, siunnersuineq takorluukkamit uniuussinnaasoq mianerisassaasorlu.

Qinigaaffiup siuliani ilinniartitaanermut naalakkersuisuullunga suliaq aallartinnikuusara matumani eqqaavara, atuartut 8. klassimiik suliffigerusutaminniit siunnersortimik peqalertarnissaat ass. atuartooq sanasunngorusuppoq taava sanasumik ingiaqatissaminik nassaasooq, taassuma malinnaavigissuaa siunnersortarlugulu. Kingorna suliffimmut isertikkiartuaarneqassaaq. Taamatut ingerlariuseq nunarsuarmioqatitsinnik iluatsilluartumik atulereernikuuvoq. Ajoraluartumik siunertaa taanna kivisiinnarneqarnikuuvoq, siunertaa pitsaasorujussuugaluartooq.

Maluginiagassaavoq Nunatsinni Suliffeqarnermut siunnersuisoqatigiit ukiaq manna innersuussutaat oqariartuutigimmassuk nassuiaasiortoqarani, suliniutit allat ingerlanneqartariaqartut soorlu: suliffimmik sungiusarnermut ilitersuinerneq pikkorissaanerit ingerlaavartumillu neqeroorutaasarnissaat suliniutigisariaqartooq.

Siumumi isumaqarpugut inuusuttuaqqap pikkoriffii aallaavigalugit siunnersuisarneq suli atuarfinni nukittorsartariaqartooq, taamaaliornikkut ilinniarnermiini uniinnartartorpassuit ikilisinneqarsinnaammata taamaattoq aamma isumaqarpugut Suliffeqarnermut siunnersuisoqatigiit innersuussutaat pisariaqartut.



Taamatut siumumiit oqaaseqarluta Naalakkersuisut akissutaat tusaatissatut tigullugu. Ataatsimiititaliamut ingerlateqqinnissaa innersuussutiginnilarput.

Doris Jakobsen Jensen, Siumut